

## Universitätsbibliothek Paderborn

**Ioannis S. R. E. Cardinalis Bona Opera Omnia**

Tribus Tomis comprehensa

Opuscula Spiritalia - I. Horologium Asceticum. II. Principia Vitae Christianae. III. Manuductio ad Coelum. IV. Via Compendii ad Deum. V. De Sacrificio Missae. VI. De Discretione Spirituum ... Operum Eminentiss.  
Cardinalis, Tom. I

**Bona, Giovanni**

**Parisiis, 1677**

Oratio RR. PP. Joannis Bona Ordinis Cisterciensis, postea S. R. E.  
Cardinalis, ad SS. Trinitatem.

**urn:nbn:de:hbz:466:1-9969**

*Ne aliquot paginae vacarent, hanc orationem hic inse-  
pendam curavimus.*

## ORATIO

*RR. PP. JOANNIS BONA Ordinis Cistercien-  
sis, postea S. R. E. Cardinalis, ad SS. Trinitatem.*

**O** Summa TRINITAS, una Virtus, indiscreta Majestas, Unitas in substantia, Trinitas in Personis; numerabiliter innumerabilis, mensurabiliter immensurabilis; invisibilis, ineffabilis, admirabilis, incomprehensibilis: Deus magnus sine quantitate, sine qualitate bonus, sine tempore sempiternus, sine situ ubique praesens, sine loco ubique totus; omnia implens sine extensio, sine indigentia omnia creans, sine motu omnia movens; in magnitudine infinitus, summus in bonitate, in virtute omnipotens, in sapientia inestimabilis, terribilis in consiliis, in verbis verax, in operibus sanctus, justus in judiciis, copiosus in misericordia, patientissimus erga delinquentes, piissimus erga penitentes; cui nec præterita transeunt, nec futura succedunt; cui nec origo initium dedit, nec tempora dant incrementum; quem nec spatia dilatant, nec voluntas variat, nec mœsta perturbant, nec læta demulcent: *Dens sanctorum Spirituum & cunctæ carnis, à cuius conspectu tremit cœlum & terra, cuius nutui obediunt elementa; vita vivificans me, lumen illuminans me. Aperi mihi clamanti portas justitiae, & ingressus in eas confitebor tibi. Te adoro, te laudo, te glorifico labiis & corde, omnique, quâ valeo, virtute te benedico; & procumbens humiliter sub pedibus magnificentiae tuæ gratias ago tibi, qui per illustrationem gratiæ tuæ illuminasti me, & per matris Ecclesiæ documenta in fide tuâ confirmasti me. Et unde hoc mihi, Factor cœli & terræ, qui bonorum meorum non eges,* unde

unde mihi hoc quod amasti me? Quid tibi dedi, & retribuisti? Ubi eram antequam fierem, & ut inciperem bonum? Sed tuâ gratiâ factus sum, & innumerabilis donis tuis honoratus sum. Perfice ergo me, qui fecisti me: perfice usque ad formam plenam imaginis tuæ & similitudinis, ad quam formasti me. Te invoco, ô beata TRINITAS, ut venias in me, & templum me facias dignum gloriae tuæ. Rogo Patrem per Filium, rogo Filium per Patrem, rogo Spiritum Sanctum per Patrem & Filium, ut omnia vitia elongentur à me, ut omnes sanctæ virtutes plantentur in me. Deus immense, à quo omnia, per quem omnia, in quo omnia facta sunt; custodi me, opus manuum tuarum, in te sperantem & in tua solummodo misericordia confidentem. Custodi me quæso, hic & ubique, nunc & semper, intus & foris, ita ut in me nullus pareat locus insidiis inimicorum. Ad te, beatissima TRINITAS, anima suspirat; quoniam à te infeliciter exulat. Discedens à te quantis se intricavit erroribus, doloribus, timoribus? Cor meum conturbatum est, & inde dolor: dereliquit me virtus mea, & inde pavor; lumen oculorum meorum non est mecum, & inde error. Verumtamen in te speravi, Domine, quoniam confitebor tibi, cum error verus à ratione, à voluntate dolor, atque à memoria timor omnis recesserit; & successerit illa quam spero mira serenitas, plena suavitatis, æterna securitas.

Æterne Pater ingenite, impassibilis; principium sine principio, auctor bonorum, fons veritatis, ac totius entitatis origo; Deitas tua me totum repleat, ejusque gloriae participem faciat, quam Filius tuus mihi promeruit, sanctifica me in veritate, ut tui timore & tremore semper stem in conspectu tuo, nec unquam mens mea à te revertatur. Fili unigenite, non posterior nec minor Patre, ei- que omnino coæqualis & consubstantialis; Deus de Deo, lumen de lumine, candor lucis æternæ, Verbum incarnatum, virtus omnipotens; sapientia, quæ ex ore

'Altissimi prodiisti ; imago Patris, splendor gloriae, & figura substantiae ejus ; illumina intellectum meum, roboris infirmitatem meam, ut te cognoscam & diligam, & tanquam unicum praesidium meum omnibus preferam.  
*Sanctissime Spiritus*, à Patre & Filio procedens, utriusque amor, & arctissimum vinculum charitatis essentialis, & totius charitatis principium ; ignis consumens, flamma vitalis, donum superans omne donum, à quo omnia bona in nos descendunt ; inflamma voluntatem meam ferventissimo tui amore & constante charitate, ut te solum queram, & universa despiciam. Adstringe me *Tibi*, & *Patri*, ac *Filio*; ut nec intellectu, nec affectu, à vobis divellar, sancta & adoranda TRINITAS. Deus meus & omne bonum meum, abrenuntio propter te omnibus mundi pompis & honoribus ; detestor omnem carnis & sensuum voluptatem : anathema divitiis & vanitatibus saeculi ; gloria mea haec sit pro te contemni, mea voluptas tibi adhaerere, meæ divitiae tibi servire, in saecula saeculorum. Amen.

## HOROLOGIUM